

續金華叢書



續金華叢書



此泉
此研

表勵準署端



甲春康宗校
子永胡楸鋟

金華東州佳山蓋南條朝源山也而靈洞又金華垂盡處韓昌黎謂凡清淑之氣盛而不過者則蜿蜒扶輿磅礴鬱積必有魁竒才德之民生其間夫南條自岷山之陽至於衡山而衡之南又自連延東趨者爲枯蒼由衢嶺歷大庾至昭武而北趨爲漁梁嶺又自漁梁以北趨者爲枯嶺由衢婺望之南山也自枯嶺轉而北趨捲東陽江諸源又轉而西峙是爲金華之山陰陽者流所謂朝源顧祖者清淑之氣鍾爲三洞古今多賢輩出于其陽其山西界澱江而止將止未止之間而爲洞者有三焉所謂靈洞之石玲瓏清瑩深不可測山榮而林秀石竇雲根之竒不可爲數清淑之氣可掬也是爲神仙之宅名勝高人多好遊焉乃若瑰竒之民數千百年以來未聞其間豈能皆隱君子世不得而聞耶或謂生才不于山之中而于山之外其信然耶不然何久秘而不發也近三十年來始得之則于君介翁父子祖孫家焉而介翁又以其魁岸竒偉之氣發爲清麗溫雅之詩豈非昌黎公所謂魁竒者耶而吾今見之也然鬱之久其發之必宏介翁之詩

固非止此抑其所以泄山川之藏者又必有大于詩者矣介翁其益勉之蘭谿金履祥吉父序

紫巖于先生詩選卷一

續金華叢書

蘭谿于石菴

五言古詩

山中

我家萬山中日日采樵去捫蘿上層巔苔滑不留履落日負樵歸雲深失歸路誰家犬吠聲聲在雲深處

又

偶因抱甕出夜汲澗底泉蕩搖水中月水定光復圓問水水不語問月月不言倚樹一長嘯萬壑松風寒

擬古

君心如柳枝春盡絮狂飛妾心如古木不受春風吹古木寧槁死可伐不可移風絮飛不已飄零將安歸

晚步

徑狹不容車溪淺不容釣平蕪淡雲烟獨鳥下殘照見山了無言倚

樹忽長嘯徘徊澹忘歸空林明遠燒

有客

有客叩我門動色談公侯權門熱於火富貴可力求我性不諧俗素拙生計謀苟求未必得徒爲君子羞拂衣起謝客夷然卧林邱

和淵明詩

林屋本深寂而多禽鳥喧一靜制羣動何必更幽偏西風掃脫葉見此林杪山朝看孤雲出暮看孤雲還雲飛亦何心相對兩忘言

宿棲眞院分韻得獨字

空翠冷滴衣石蘚滑吾足偶隨白雲去棲此林下屋樓影挂斜陽鐘聲出深竹山僧老面壁誰與伴幽獨分我雲半間欹枕聽飛瀑

寄意

妾家有明鏡百鍊方能成寶匣玉爲臺持以奉良人自恃妾貌妍懶拂鏡上塵妾貌未及衰妾鏡先已昏貌衰不再少鏡昏能再明爲君一磨拭炯炯光如新徒能照妾貌安能照妾心

述懷

孔明卧隆中世事若不聞草廬兩三策大義固已明陶潛晉處士束帶恥屈身浩然歸去來把酒惟長吟潛魚遊深淵好鳥鳴高林是以古君子出處各有心

庭前有松樹

庭前有松樹百尺盤虬龍材大不適用偃蹇霜雪中五陵年少兒種花不種松寄言傲霜雪何似媚春風松有千歲根花無十日紅眾人逐時好君子惟固窮

採梅花分韻得香字

絕壁兩履雲荒村半橋霜孤往欲何之林下幽徑長寒梅在何許臨風幾徜徉誰家斷籬外一枝寄林塘水靜不搖影竹深難護香無言獨倚樹山空月荒涼

所懷寄何主簿

斜日明遠樹落葉走空堦閉門寂無事心澹境自佳美人期不來此

樂誰與偕豈無南飛鴈可以寄所懷所懷不可寄孤雲渺天涯

蟬

斜陽挂庭樹有蟬鳴樹巔無端聒人耳驚我閑窗眠吾觀動物中至清莫如蟬翩然脫污濁飽餐風露寒此外一無求何苦浪喧喧口絀祇屢憎不如且忘言

擬古

東籬有佳菊埋沒野草傍草蔓日以滋菊苗日以荒生意幾欲息菊短草何長深秋嚴霜下百草不復芳采采東籬花澹然發幽香萬物各有時盛衰固其常榮華不足恃窮困果何傷

送趙宰之上虞

百里子男邦職任非不厚治民如牧羊擾之則驚走睠茲上虞邑江海環左右蕭蕭北風寒怒濤聲撼吼元亮已賦歸世事付盃酒宗子古維城此行應不苟繭絲與保障二者孰先後勉旃重勉旃毋袖經綸手

其二

吾聞句踐國昔有鴟夷子沼吳收雋功扁舟五湖裏又聞越東山安
石眞奇士一局別墅碁失笑屐折齒緬懷百世風可以肅頑鄙哉哉
禹穴山滔滔浙江水山川今猶昔寧無安與蠡爲我謝二公幸爲蒼
生起

感興二首

愚公欲移山精衛欲填海嗟乎智力窮山海元不改春秋更戰國仁
義日荒怠近趨管晏功遠受儀秦給楊墨騁邪說申韓禍無罪孔孟
生其間迂濶誰復採羣囂競紛紜智力幾百倍山崩海可竭吾道固
長在

游魚聞餌香寧悟鉤入口不忍一朝飢竟落漁人手捕雉必以媒相
呼欣得偶失身羅網中乃爲媒所誘嗟哉二物微智不料其後飛潛
一失所雖悔復何咎矧爲物之靈而不慎所守飢渴能害心交游多
賣友

次韻秉國種菊

淵明令彭澤自謂歸來好外物一無累剛被菊花惱東籬興悠然一
醉舒懷抱陶沒已千載愛菊人何少誰能輕富貴高蹈一世表種菊
學淵明此意何矯矯栽培春雨中不待秋風老南山無古今世事何
時了先生笑不言杜門方却掃

贈張君玉

閉門十日雨蕭然抱孤琴之子從何來踏雨叩我門對床話達曉山
窗耽青燈挽衣不可留何以贈子行問子此何時眯目淒黃塵四海
非不寬可語今幾人瀟瀟風雨中奔走欲何營願子重自愛堂有白
髮親

八月十四夜對月

好風從西來浮雲忽中披片月耿層空清氣入詩脾皎皎萬里光誰
言一分虧虧者盈之漸乘除迭相推既圓終復缺何如未圓時過滿
易招損極盛必有衰人事無不然一笑姑置之願我尊有酒何喜亦

何悲頽然就一醉月落吾不知

山中何所有

山中何所有古松與清泉一泓涵素月千尺搖蒼煙我生乏世用梁
此山林閑臨流或倚樹物我兩悠然慎勿作梁棟斧斤斲其天慎勿
入江海洶湧生波瀾流蕩易忘返正直難自全我欲叩其理水去松
無言

感興 五首

吳起爲魯將殺妻殊不仁樂羊伐中山食子太無情功名苟爲重骨
片無乃輕以此謀富貴何如甘賤貧沛豐三尺劍抵掌收楚秦未央
王卮壽以功驕父兄惜哉一杯酒終愧一杯羹

晉人殺鳴犢孔子不渡河河之水洋洋臨流一長歌豈無舟與楫所
懼蛟與鼉蛟鼉任險怪不渡如我何黃鵠一遠舉奚憂嬰網羅

衛人將授甲鶴有乘軒寵愛人不如禽士固不爲用唐人競朝梁怒
殺孫供奉獸猶知有君人胡不愧悚

鷹犬飽梁肉飢人厭粥糜墻屋被文繡民有號寒兒禽獸食人食土
木衣人衣俗偷或過侈民窮易爲非君子固有守豈若世所爲富貴
苟可得貧賤終莫移

羣棲平沙鴈有警奴輒鳴鳴多謂奴妄哀嗷墮弓贈雉雉中林鹿以
媒誘其羣相呼入網罟鹿死媒獨生骨肉不相信效忠况他人輕言
託心腹賣友終不仁君子能審友四海皆弟兄

有所思

君在南山南水濶雲漫漫我在北山北木落天地寬所思不可見孤
峯碧巘屹片雲遙相望脉脉一水間水流渺何許撫松獨盤桓人生
有離合把酒欲問天何以寄所思取琴倚風彈一彈不成調再彈誰
與言把琴渺無寐月落空山寒

杜少陵贈衛八處士韻別兼國

昔君坐談詩古音振宮商昔我起舞劍三尺星斗光我劍何慷慨君
詩何老蒼感此一笑嘆徒成九迴腸久別忽相見歲月驚惶惶豈無

平生友對面險太行知心今幾人况復天一方安得飛霞佩拱挹天
瓢漿道義有真樂何必甘膏粱臨行勸我酒我飲不盡觴一飲情易
闌再飲情更長斜陽重回首烟水空蒼茫

示衢子

我學三十年巧不能勝拙汝年今弱冠慎勿虛歲月何必千里師而
後可受業何必萬卷書而後稱博洽讀書貴有用豈徒資筆舌立身
一弗謹萬事皆瓦裂蔬肉同一飽自可甘薇蕨布帛同一煖何必輕
裋褐貧賤士之常紛華安足悅晴窗明几視夜燈耿風雪汝今其勉
旃經史須涉獵顧我何足學當學古賢哲

戊子元夕大雪

去年逢元夕交光燈與月今年逢元夕交光燈與雪有月已堪奇一
雪更奇絕燦爛星斗光晃耀瓊瑤闕紛紛競兒嬉笙歌聲不歇年來
獨衰懶頗亦厭喧雜呼兒早閉門擁爐燒落葉雪月兩不知孤燈任
明滅

次張嘉父閑居

有詩可以吟何必擬李陵有酒可以酌何必慕伯倫自吟復自酌一笑睨白雲卷舒見吾道聚散亦世情老我一茅屋蕭蕭山下村種瓜有餘地吾亦安吾貧興來卽杖履孤往無與朋晨出未啟戶暮歸或叩門翛然脫塵鞅無懷與大庭所以軒冕貴不移邱壑心此意誰獨識千載一淵明淵明不復作視此壁上琴

伯勞

嗚呼有生初蠢蠢不知幾血氣均有欲擾擾靡窮已伯益烈山澤庭氏挾弓矢驅除或未盡遺類復紛靡豈惟梟鳥惡亦有伯勞氏瑣瑣至微物凶悖乃如此不思天壤間萬物雖異類子之於父母恩愛均一理卵翼哺爾成胡爲遽忘義昔聞烏反哺羔羊能跪乳蜂蟻識君臣豺狼知父子寄語當世人爲此勿爲彼

鵲鴉行

世以鵲爲吉人多喜其鳴世以鴉爲凶鳴多人輒嘆吉凶一以定噫

喜此爲分相彼新羅鷓於何分愛憎羣鷓競喧集有耳若不聞一鷓
不相容搏擊以爲能不知鷓可喜甘與鷓爲羣妬善復黨惡鷓悍徒
不仁石顯怙耀寵望之不容身林甫擅柄用何有乎九齡寧爲望之
辱不作石顯榮寧爲九齡死不作林甫生邪正苟倒置是非竟難陳
人事無不然何獨此微禽

故家有喬木

故家有喬木眾鳥巢其枝紛然各卵育自啄還自飛誰歟恣殘忍絲
木登其危毀室取爾子殺戮輕如嬉漂搖風雨中巢破不復支破者
尙可完死者終無歸自謂翔後集今乃失所依胡不舍之去遠擇高
林棲主人不我愛舍此復何之哀哀鳴向天路遠天不知吾聞重太
息事莫大於斯弱肉強之食擾擾今何時人生且未保爾死誰復悲
寄言民父母赤子方流離

鄰叟言

客行歸故鄉依依一鄰叟把手向我言重嘆生不偶大男年二十前